



Teks Ucapan

Yang Berhormat  
Dato Seri Setia Ir. Awang Haji Suhaimi bin Haji Gafar  
Menteri Pembangunan

Sempena  
**MAJLIS PELANCARAN LBD CIRCULAR**

Tarikh  
Sabtu, 26 Rabiulawal 1441H / 23 November 2019M

Bertempat  
Dewan Atria Simpur, Ibu Pejabat Jabatan Kerja Raya

Jam  
2.30 petang

بِسْمِ اللَّهِ الرَّحْمَنِ الرَّحِيمِ  
الحمد لله رب العالمين  
والصلاة والسلام على أشرف الأنبياء والمرسلين  
سيدنا محمد وعلى آله وصحبه أجمعين

Yang Mulia

Dato Seri Paduka Ar. Awang Haji Marzuke bin Haji Mohsin  
Timbalan Menteri Pembangunan

Yang Berhormat

Dayang Nik Hafimi binti Abdul Haadii  
Ahli Majlis Mesyuarat Negara

Yang Berhormat

Awang Haji Abdul Hamid @Sabli bin Haji Arsad  
Ahli Majlis Mesyuarat Negara dan Presiden Dewan Perniagaan dan  
Perusahaan Melayu Brunei

Yang Mulia

Setiausaha-Setiausaha Tetap, Timbalan Setiausaha Tetap,  
Ketua-Ketua Jabatan, Pegawai-pegawai Kanan Kementerian Pembangunan

Yang Mulia

Pemilik-pemilik dan pengurus-pengurus syarikat  
serta hadirin dan hadirat yang dihormati sekalian

السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ

Salam Sejahtera dan Selamat Tengahari

1. Alhamdulillah, saya bersyukur ke hadrat Allah Subhanahu Wata'ala kerana dengan dengan limpah dan rahmatNya jua telah mengizinkan kita semua bersama dan berhimpun di Majlis Pelancaran Local Business Development Circular (atau ringkasnya LBD Circular), Kementerian Pembangunan pada petang ini.
2. Terlebih dahulu, peramba/saya ingin mengucapkan Tahniah kepada Jabatan-Jabatan dan Divisyen yang terlibat iaitu Jabatan Kerja Raya, Divisyen Penyelarasan Polisi dan Pelan Strategik, Kementerian Pembangunan serta Autoriti Kawalan Bangunan dan Industri Pembinaan (ABCi) yang telah sama-sama mengungkayahkan dalam penyediaan Local Business Development Circular atau Surat Pemberitahuan Pembangunan Perniagaan Tempatan yang akan dilancarkan hari ini.
3. Dalam menerajui pembangunan infrastruktur fizikal dan sosial negara, kementerian ini memang menyedari kepentingan untuk memberi fokus kepada pembangunan perniagaan tempatan demi menghasilkan pembangunan negara yang seimbang. Oleh itu, LBD Circular ini diperkenalkan adalah sejajar dengan usaha Kerajaan Kebawah Duli Yang Maha Mulia Paduka Seri Baginda Sultan Dan Yang Di-Pertuan Negara Brunei Darussalam untuk memastikan pembangunan yang mampan bagi kapasiti, keupayaan, kompetensi dan daya saing syarikat-syarikat tempatan dan juga bagi merealisasikan perancangan strategik Kementerian Pembangunan dalam mendokong pembangunan perniagaan tempatan sebagai tonggak pertumbuhan dalam industri pembinaan di Negara ini.

Hadirin dan hadirat yang dihormati sekalian,

4. LBD Circular Kementerian Pembangunan ini memberikan tumpuan kepada tiga bidang strategik utama iaitu pertama, pemilikan dan pengurusan syarikat tempatan (local ownership), kedua, penggunaan barangan pembinaan tempatan dan perkhidmatan tempatan (iaitu local content) dan ketiga, memberikan peluang-peluang pekerjaan untuk anak-anak tempatan (iaitu, local employment).
  
5. Menyentuh mengenai local ownership, pihak kementerian sejak dari dulu memang mengharapkan bagi pengusaha syarikat-syarikat tempatan untuk menerajui industri pembinaan dinegara ini, termasuklah di luar negeri dan dapat bersaing diperingkat serantau dan antarabangsa. Pihak Kementerian Pembangunan mengambil maklum, terdapat sebilangan syarikat yang dimiliki oleh orang-orang tempatan yang berjaya dan telah memberikan sumbangan kepada pembangunan negara. Akan tetapi masih terdengar dan terdapat banyak lagi syarikat-syarikat yang mana diurustadbir oleh orang-orang asing dan pemilik-pemilik tempatan hanya menggunakan nama mereka untuk pendaftaran sahaja. Perkara sedemikian sangat merugikan, kerana setiap tahun Kerajaan menyediakan peruntukkan yang besar bagi membiayai projek-projek pembangunan di Negara ini. Selaku pemilik tempatan haruslah mengambil peluang ini, dan dengan penglibatan pemilik tempatan sepenuhnya pihak Kementerian berpendapat boleh membantu negara ini memberikan peluang-peluang pekerjaan kepada anak-anak tempatan. Ke arah memastikan penglibatan pemilik-pemilik syarikat tempatan, pihak Kementerian telah mula menemuduga pemilik syarikat kelas I dan II. Temuduga ini adalah pra-syarat pendaftaran yang dikenakan bagi pendaftaran baru syarikat-syarikat di dalam Kelas I dan II. Pihak Kementerian juga seterusnya akan menilai semula

pendaftaran semasa pihak syarikat menghadapkan permohonan untuk membaharui sijil pendaftaran syarikat nanti. Jika pemilik-pemilik syarikat berkenaan tidak mencapai pemarkahan yang ditetapkan maka Sijil Pendaftaran Kontraktor tidak akan diperbaharui dan hanya diberikan Lesen Pembina sahaja.

6. Menyentuh mengenai local content pula, adalah diketahui bahawa negara kita banyak bergantung kepada penggunaan bahan-bahan dan produk-produk dari luar negara. Ke arah ini, apa yang dihasratkan ialah syarikat-syarikat pembinaan di Negara ini akan dapat memberi keutamaan bagi penggunaan bahan dan produk binaan tempatan atau dari pembekal-pembekal tempatan. Ini akan dapat mendokong industri pembuatan dan pembekal tempatan dan secara tidak langsung ianya akan memberikan manfaat kepada banyak pihak.
7. Menyentuh mengenai local employment pula, industri pembinaan masih dikuasai oleh pekerja-pekerja asing, ini termasuklah jawatan-jawatan yang sebenarnya boleh diisikan oleh anak-anak tempatan seperti pengurus, jurutera, pemandu dan sebagainya. Kita semua faham, pekerjaan dalam industri ini begitu mencabar dan persaingan yang tinggi bagi anak-anak tempatan kita, namun kita percaya masih terdapat ruang dan peluang pekerjaan yang harus di ambil oleh anak-anak tempatan. Pencari kerja pula seharusnya tidak melepaskan peluang ini kerana industri pembinaan adalah merupakan industri ketiga terbesar yang memberikan peluang pekerjaan untuk anak-anak tempatan.
8. Beberapa sasaran telah ditetapkan bagi setiap bidang strategik yang mana semua syarikat yang ingin mengikuti dan melaksanakan

perolehan kerajaan dalam industri pembinaan di bawah Kementerian Pembangunan, diperlukan untuk mencapai sasaran tersebut.

9. Jabatan pelaksana seperti Jabatan Kerja Raya dikehendaki mengenal pasti kriteria-kriteria dan skop-skop projek tersebut dan memastikan penglibatan Syarikat, penggunaan produk dan perkhidmatan tempatan serta menggalakkan dan memastikan peluang-peluang pekerjaan tempatan sebanyak mungkin dalam sesebuah projek.
10. Saya menasihatkan kepada pihak-pihak yang terlibat dalam merancang dan melaksanakan inisiatif inisiatif ini supaya memperkasakan LBD circular ini demi mencapai dan meningkatkan lagi sasaran tiga bidang utama yang dinyatakan tadi.
11. Menyentuh mengenai perlaksanaannya pula, LBD Circular ini sudah setentunya akan memberi impak kepada syarikat pembinaan, konsultan dan pembekal tempatan. Ianya diperkenalkan bukan bertujuan untuk menyukarkan atau melambat-lambatkan urusan perniagaan. Perkara ini mungkin agak sukar untuk dilaksanakan sepenuhnya, namun saya percaya dengan adanya kerjasama dan keyakinan yang tinggi dari semua pihak khususnya warga Kementerian Pembangunan dan syarikat-syarikat swasta termasuk orang ramai, In Shaa Allah matlamat yang dirancang dengan berkonsepkan *whole of nation approach* serta semangat kerjasama dan komitmen yang tinggi dengan mind-set yang positif akan dapat dicapai.
12. Sehubungan dengan ini, dalam memastikan pelaksanaan LBD dijalankan dengan efektif serta progresif, pihak Kementerian akan menubuhkan satu unit khas iaitu Unit LBD di bawah Autoriti Kawalan Bangunan dan Industri Pembinaan (ABCi). Unit ini bertanggungjawab

bagi menyelaraskan pelaksanaan, pemantauan dan peningkatan LBD di bawah Kementerian Pembangunan. Unit ini juga akan memastikan kemajuan LBD dirancang oleh Jabatan / Divisyen pelaksana mengikut circular LBD yang telah ditetapkan dan memantau peningkatan pengambilan pekerja tempatan dalam industri pembinaan secara keseluruhan.

13. Dengan ini saya percaya segala usaha Kerajaan Kebawah Duli Yang Maha Mulia Paduka Seri Baginda Sultan Dan Yang Di-Pertuan Negara Brunei Darussalam dalam menyediakan dan melaksanakan pelan tindakan akan menyumbang ke arah strategi yang relevan dan dapat memastikan pelaksanaan program LBD selaras dengan strategi ke lima, Pembangunan perniagaan Tempatan dalam Wawasan Brunei 2035.
14. Bagi mengakhiri ucapan saya, sekali lagi saya merakamkan ucapan setinggi-tinggi tahniah, penghargaan dan terima kasih kepada pegawai-pegawai yang komited dalam penyediaan Local Business Development Circular ini dan diucapkan terima kasih juga kepada pihak Autoriti Kawalan Bangunan dan Industri Pembinaan (ABCi) dalam menjayakan dan mengungkapkannya Majlis Pelancaran LBD Circular pada petang ini.
15. Dengan kalimah Bismillahirrahmannirrahim serta bertawakal kepada Allah Subhanahu Wata'ala serta Selawat dan Salam ke atas junjungan besar kita Nabi Muhammad Sallahu Alaihi Wassalam, Saya dengan ini melancarkan LOCAL BUSINESS DEVELOPMENT CIRCULAR, 2019' pada hari ini, Sabtu 26 Rabiulawal 1441H bersamaan 23 November 2019

Sekian, Wabillahitaufiq Walhidayah

Wassalamu'alaikum Warrahmatullahi Wabarakatuh